

दिनांक 03.05.2025

समय: 18.48 बजे

- प्रधानमंत्री नरेन्द्र मोदी अर अंगोला रा राष्ट्रपति जोंआओ लोरेंसो बीचे नई दिल्ली मांय मुलाकात-दोन्यू देशां बीचे खेती-बाड़ी, पारम्परिक ईलाज अर संस्कृति समेत न्यारा-न्यारा हलकां ऊं जुड़्या करार व्हां
- पंजाब सागे झगड़ा पाछे हरियाणा राजस्थान री पांती रो करीब 500 क्यूसेक पाणी रोक्यो
- राज्य मांय आज केई ठौड़ां तेज हवा सागे बिरखा व्हेवण ऊं गर्मी ऊं साता मिली-मौसम विभाग रो सात जिलां मांय अंधड़-बारिश रो ऑरेंज अलर्ट
- वेक्स 2025 मांय जाणकार पायरेसी रे खिलाफ एकीकृत कार्यवाही री ज़रूरत बतायीं

000

अफ्रीकी देश अंगोला रा राष्ट्रपति जोंआओ मनुएल गोंज़ाल्वेस लोरेंसो आज नई दिल्ली मांय प्रधानमंत्री नरेन्द्र मोदी सागे मुलाकात कीनीं प्रतिनिधिमंडल स्तर री बातचीत पाछे भारत अर अंगोला बीचे खेती-बाड़ी, ईलाज रा पारंपरिक तरीका अर संस्कृति समेत न्यारा-न्यारा हलकां ऊं जुड़्या केई करार माथे सही करी ज्यीं ई पाछे खबरनवीसां सागे बातचीत करता थकां श्री मोदी कह्यो के अंगोला री रक्षा संबंधी ज़रूरतां पूरी करण मांय भारत वां री मदद करेलां

.....

श्री मोदी कह्यो के आतंकवाद इन्सानियत सारू सब ऊं मोटो खतरो हैं वे सरहद पार ऊं आतंकवाद रे खिलाफ़ भारत री लड़ाई मांय अंगोला कानी ऊं मिली हिमायत सारू वां रो धन्यवाद कीनीं

.....

अंगोला रा राष्ट्रपति लोरेंसो कह्यो के 38 साल मांय पहली दफ़ा व्हे रह्यो भारत रो ओ दौरा अंगोला सारू घणो खास हैं वे कह्यो के इण ऊं दोन्यू देशां बीचे दोस्ताना रिश्तां सागे उद्योग अर निवेश ने बढ़ावो मिलेलां अंगोला रा राष्ट्रपति भारत रा तीन दिन रा दौरा सारू काल नई दिल्ली पधार्या हां

000

भारत, पाकिस्तान ऊं हर भांत री चीजां मंगावण माथे तुरत रोक लगा दीनी हैं विदेश व्यापार महानिदेशालय ई बाबत अधिसूचना जारी कर दीनी हैं पहलगाम आतंकी हमला पाछे भारत, पाकिस्तान सागे हर भांत री डाक अर पार्सल री आवाजाही ई निलंबित कर दीनी हैं संचार मंत्रालय रे मुजब सरकार हवाई अर जमीनी गेला ऊं डाक अर पार्सल री आवण-जावण निलंबित करण रो फैसलो कीनी हैं ई बीचे राज्य मांय ई हिफाज़त ने ध्यान राखता थकां पुलिस पूरी तरह चौकस हैं पुलिस गैर-कानूनी तरीका ऊं रह रह्या बंगलादेशियां री धरपकड़ सारू लगातार काम कर रही हैं डीग मांय पुलिस री 17 खास टीमां ढाबां, ईट-भट्टां अर होटलां मांय जांच कर रही हैं झुंझुनू रा एस.पी. ई कच्ची बस्तियां मांय रेहवण वाळां रा कागज़ात री जांच करण रा हुकम दीना हैं

000

पंजाब अर हरियाणा बीचे पाणी ऊं जुड़्या झगड़ा रो असर प्रदेश मांय ई पड़बा लाग्यो हैं पंजाब भाखड़ा नहर ऊं हरियाणा ने दिया जावण वाळा पाणी री तादाद कम कर दीनी है, ज्यीं कारण हरियाणा ई राजस्थान री पांती रो करीब 500 क्यूसेक पाणी रोक दीनी हैं ओ पाणी सिद्धमुख नहर रे जरिए हनुमानगढ़ जिला री नोहर अर भादरा तहसीलां ताई पूगे हैं हालात ने ध्यान राखता थकां जल संसाधन विभाग रा अहलकार दिल्ली पूग ग्या हैं भाखड़ा ब्यास मैनेजमेंट बोर्ड री मीटिंग मांय तीन ई राज्यां बीचे पाणी रा बंटवारा ऊं जुड़ी चर्चा करी जा रही हैं ई बीचे संसदीय कार्यमंत्री जोगाराम पटेल कह्यो के जल जीवन मिशन रा तैत कर्या जा रह्या कामां मांय करी ज्यी कथित गड़बड़ियां री जांच करी जा रही हैं वे आज जोधपुर मांय खबरनवीसां सागे बातचीत करता थकां कह्यो के जल जीवन मिशन रा तैत कर्या जा रह्या कामां मांय गड़बड़ियां रा जिम्मेदार लोगां ने नी बख्शा जावेलां

000

रेलमंत्री अश्विनी वैष्णव अर केन्द्रीय संस्कृति अर पर्यटन मंत्री गजेन्द्र सिंह शेखावत आज जोधपुर ऊं दो रेल सेवावां री सरुआत कीनीं जोधपुर रा भगत की कोठी रेलवे स्टेशन परां राख्यी ज्या कार्यक्रम मांय दोन्यू केंद्रीय मंत्री जोधपुर-पुणे एक्सप्रेस अर जोधपुर एमजीआर चेन्नई सेन्ट्रल एक्सप्रेस गाड़ियां ने हरी झंडी बतायीं ई दौरान सांसद पी.पी. चौधरी अर राजेन्द्र गहलोत समेत जनता रा केई नुमाइन्दा ई मौजूद हां ई मौके केन्द्रीय पर्यटन मंत्री गजेन्द्र सिंह शेखावत कह्यो के आं दोन्यू रेलगाड़ियां ऊं लोगां ने दूर रेहवण वाळा रिश्तेदारां सागे संपर्क मांय सहूलियत व्हे जावेलां

0000

प्रदेश मांय लारला दिनां सरकारी महकमां री वेबसाइटां माथे व्हा साइबर हमला ने ध्यान राखता थकां सूचना प्रौद्योगिकी मंत्री कर्नल राज्यवर्द्धन राठौड़ आज जयपुर मांय साइबर हिफाजत रा बारा मांय मीटिंग लीनीं मीटिंग मांय सूचना प्रौद्योगिकी अर ऊर्जा समेत केई महकमां रा अहलकार सिरकत कीनीं ई मौके आई.टी. रा जाणकार रिटायर्ड कर्नल निधीश भटनागर खास जाणकारियां दीनीं

खबरनवीसां सागे बातचीत करता थकां श्री राठौड़ कह्यो के साइबर सारु जरूरी कार्य योजना बनावण सागे ही लगातार नुवी जाणकारियां हासिल करणो जरूरी व्हे हैं वे कह्यो के साइबर हिफाजत सारु राज्य रो आईटी विभाग मजबूत साइबर शील्ड बनावण बाबत काम करेलां

.....

000

राज्य मांय आज केई ठौड़ां जोरदार बायरो बाजण सागे बिरखा व्ही जद के कठे-कठे आंधी चालीं नागौर, झुंझुनू अर चूरु समेत केई ठौड़ां दोपहरां पाछे आंधी चाली अर बिरखा सागे ओळा पड़्यां राजधानी जयपुर मांय ई दोपहरां पाछे तेज हवा सागे बारिश व्ही कोटा, बारां, झालावाड़ अर डीग समेत केई ठौड़ां आज बादळा मण्ड्या रह्या अर छांटो-छिड़को व्हायों म्हाणी डीग खबरनवीस बतायो के वठे पारो उतरण ऊं लारला दो दिन मांय जोरदार गर्मी ऊं साता मिली हैं

.....

मौसम विभाग आज सात जिलां मांय तेज अंधड़ अर गरज सागे बिरखा व्हेवण बाबत चेतायो हैं राज्य मांय आज कठे ई लू नी बाजी अर 7 मई ताई पारो कम रेहवण रा आसार हैं झुंझुनू जिला मांय काल आया अंधड़ रे कारण घणा नुकसान हुआं जिला कलेक्टर रामावतार मीणा बतायो के गांवाई हलकां मांय अंधड़ ऊं बिजली रा खम्भां अर तारां ने नुकसाण व्हायो है अर केई ठौड़ां ट्रांसफार्मर ने ई नुकसाण पूग्यों

000

राजस्थान देश मांय आयुष आधारित स्वास्थ्य सेवावां मांय अगाड़ी राज्य रा तौर ऊं सामी आयो हैं काल मुंबई कने लोनावला मांय पूरा व्हा राष्ट्रीय आयुष मिशन कॉन्क्लेव मांय राज्य री स्वास्थ्य सेवावां रा बुनियादी ढांचा अर सार्वजनिक स्वास्थ्य प्रणाली री सराहवणा करी ज्यीं उपमुख्यमंत्री अर आयुष मंत्री डॉ. प्रेम चंद बैरवा कॉन्क्लेव मांय कह्यो के देश मांय सब ऊं बत्ता 2019 आयुष्मान आरोग्य मंदिर राजस्थान मांय चाल रह्या है, ज्यां मांय ऊं 50 आयुष्मान आरोग्य मंदिरां ने राष्ट्रीय अस्पताल प्रमाणन बोर्ड री ओर ऊं सर्टिफिकेट ई दिया ज्या हैं मिशन रा तहत राज्य मांय 50 बिस्तरां वाळा आठ एकीकृत आयुष अस्पताल ई खोली ज्या हैं

000

राजस्थान हाईकोर्ट शिक्षा रा अधिकार कानून-आर.टी.ई. रा तहत नर्सरी अर पहली कक्षा मांय दाखिला देवण ऊं जुड़्या लारला हुकम मांय बदलाव कीनो हैं अदालत कह्यो के गैर-सरकारी स्कूलां मांय नर्सरी या पहली कक्षा मांय ऊं जो भी सरुआती कक्षा हो, वां मांय आरटीई रा तहत दाखिलो देवणो व्हेलां जस्टिस श्रीचन्द्रशेखर अर जस्टिस आनंद शर्मा री बैंच राज्य सरकार अर एक गैर-सरकारी स्कूल री ओर ऊं दायर अपीलं माथे सुणवाई करता थकां ओ हुकम दीनो

000

राष्ट्रीय परीक्षा एजेंसी-एनटीए री ओर ऊं काल नेशनल एलिजिबिलिटी कम एन्ट्रेंस टेस्ट-नीट यूजी परीक्षा ली जावेलां मेडिकल अर डेंटल कॉलेजां रा एम.बी.बी.एस. अर बी.डी.एस. कोर्स मांय दाखिला सारु व्हेवण वाळो ओ इम्तिहान दोपहरां पाछे दो बज्यां ऊं सिंज्यां पांच बज्यां ताई एक पारी मांय लियो जावेलां ई सारु राज्य मांय ई बणायी ज्या परीक्षा केन्द्रां माथे सगळी तैयारियां पूरी कर लीरीजी हैं

अर अब मुंबई मांय चाल रह्या विश्व मीडिया अर मनोरंजन शिखर सम्मेलन—वेक्स री जाणकारी—

.....

वेक्स 2025 रा तैत आज केई पैनल चर्चावां अर सत्र राख्यी ज्यां एक पैनल चर्चा मांय जाणकार पायरेसी रे खिलाफ कार्यवाही री अपील कीनीं **प्रौद्योगिकी के माध्यम से सामग्री की सुरक्षा** मुद्दा माथे व्ही चर्चा रे दौरान ई बारा मांय जाग जगावण माथे जोर दीनों

000

आज प्रेस स्वतंत्रता दिवस मणायी ज्यों ई मौके प्रदेश मांय ई खास कार्यक्रम राख्यी ज्यां पाली रा कलेक्ट्रेट परिसर रा प्रेस कार्यालय मांय राख्यी ज्यी संगोष्ठी मांय पत्रकारां रो मान करी ज्यों भरतपुर मांय लोहागढ़ प्रेस क्लब री ओर ऊं राख्यी ज्यी संगोष्ठी मांय प्रेस री आज़ादी अर पत्रकारिता री भूमिका रा बारा मांय चर्चा करी ज्यों ब्यावर रा एक कॉलेज मांय विद्यार्थियां सारु खास कार्यक्रम व्ह्यों

000

सरहदी ज़िला जैसलमेर मांय मोटी तादाद मांय गौवंश 'करा रोग' री फेंट मांय आ रह्यो हैं हालात रो जायजो लेवण सारु जयपुर ऊं पशुपालन विभाग रा अहलकार जैसलमेर पूग्यां वे ज़िला रा गांवाई हलकां मांय ढांढा राखण वाळां सागे बातचीत कर र ई बारा मांय जाणकारी लीनीं विभाग रा संयुक्त निदेशक उमेश वरगंटीवार बतायो के ई बीमारी रो सामो करण सारु खास टीमां बणायी ज्यी है जो गांव—गांव जा र लोगां ने जाणकारी दे रही हैं

000